

道古堂詩集

橙花館集序

漢武帝英風大略旁招羣彥故一時儒行如董生經術如兒大夫通博如終童長短縱橫如主父偃應對如嚴助朱買臣詞賦史才如兩司馬獨東方先生不名一行談諧戲侮跌宕於巖廊之上是以當時目之爲俳優後世驚以爲鬼物余謂先生閱覽博物君子也玩世不恭捷給澹辭至於泰階之符辟戟而諫其大節偉矣崑玉秋霜比質可也吾友杭子大宗言不純師行不純德絕類東方先生之爲人平生勤於聚書晨鈔晦寫者十有餘年而畢方不來騶牙不至無以證其蓄積之叢叢於

是形諸詩歌一往不可罄控嘗放言曰鏤金錯彩論者  
弗尚然學不贍則詞不備詞不備則氣不充胸無安世  
三篋書日搦管作蒼蠅聲奚可哉公等已矣予謂古之  
作者沈酣於卷軸而濬發於靈臺能役書不爲書役大  
宗持論不可爲正鵠然大宗雖淵然不可究詰而能運  
之以越石之清剛出之以景純之豪雋其所以見撫一  
世者固不盡如所云矣予行役四方久不見大宗詩今  
年貂敝金盡垂翼而歸大宗爲余蹙額者累日握手相  
慰外出其近作十餘首益麗以肆而其送小弱弟一章  
則小宛之遺音也小弱弟就昏于黔陽黔陽去杭三四

千里溯錢唐浮洞庭累月踰時乃可至也其間霹靂魍  
魎酸雨狂濤春風斑竹古渡神鴉凡小弱弟之所跋涉  
而驚且惋者一一著之於篇余讀其詩而壯其奇且悲  
其志也大宗曰余詩類此者夥矣子其爲我序之嗚呼  
大宗磊落豪宕之氣所謂玩世不恭者非耶然觀其友  
朋骨肉之間其大節可觀矣雍正五年歲次丁未閏三  
月上浣錢唐龔鑑

過春集序

夫金臺千里能造必詩銅街九條敢往則賦太乙分曜  
靈之景而藜之用蓋寡長庚攀超光之足而鯨之振以  
末故歡情似酒崇伯望而解顏愁緒縈絲墨翟逢而曾  
歎蘭可佩也對靈均而不芳月豈愁乎照陳王而易落  
準之今日寧有易哉帝城十二獨我無家客路三千送  
人作郡裝落葉以驅壽披浮雲以旌心出門則稚子牽  
裾登車則老人把袂浮河亂濟步將前而不舒餞露宿  
星目已罷而猶顧直沽河下雪古風堅曲阜城邊青危  
碧峭覩疲衛之勅進值敝貂之不溫則知情以時感心

蘇目傷固當徵彼詩寮壯茲行色況以茫茫鐵網竟漏  
珊瑚落落金盤誰餐沆瀣骨具烟霞之相身畱柏石之  
緣局逸步以趨時蓄奇聲而待旦殘膏旣燼間理餘光  
渴睡初醒或耽短詠良以酒徒市上最多拊缶之羣學  
士壚頭不減畱髡之樂是用牽纏積素揮灑性靈及夫  
驅唱蒼涼歸鞭蕭瑟北地有絕憐之處南雲有望遠之  
思罔兮若有求而不至也悵乎若有待而不已也非無  
贈荅之章亦以彬布爲快日月旣長卷帙遂衍則斯集  
之大凡矣若云旣和且平雖怨不怒提攜標格澄震聲  
音斯固大雅之式鄙人莫贊辭焉嗟乎身以賤而趣成

道不行而樂在兩三曲榭未免有情數四荒齋居然無  
恙新編在手狂瀟滿牀高臥北窗之下但寘身欲尚義  
皇狎作西湖之遊任譏人不耐官爵則智津萬有音暢  
百形衆皆麗此清神僕亦勉爲燕說錢唐周天度

赴召集序

國家承先朝餘教以文學唱天下下詔敦勸招延海  
內閎通博達之士於時新進舊耆後先相踵振采儒林  
天下烝然發動秀水朱太史竹垞以鴻鉅之才辨音正  
始斥遠浮空蓋風雅之道郁郁繇此盛矣當時上下怡  
安民物給足士不迫寒餓豪家右族或開館飭具以接  
英賢公卿不以章服先韋布禮敬餽進幸其一到以爲  
榮而故臣耆舊多往時名人胥與導揚遺緒爲後生磁  
引蓋吾歎風教之畱遺者遠也事更百年世經兩嬗其  
他盡從遷變而獨文學之士流韻餘思猶足鼓盪人心



徧一世爲習尚蓋未有以是爲無益而捨去之者自諸公相接淪沒後進不見前賢風旨沉塞於世俗之文鎖閉堅牢不復可啟若是而欲進與語古譬猶奏絲竹于龔者之前傾耳而莫之聞也而況夫深博之學性命之詣歟則亦有桀黠自好者矯而更之強其外空其中不根而植自詭可到前人哆然尊已卑物睥睨篤古之士搜瑕索癥齟齬舐觸恐不速敗嗚呼古學之不昌其有不由此歟吾友杭君堇浦少蘊清才其于古若以水入水浹而莫覩其迹也其于學一日千里而猶慊慊也怵不能至也故其爲詩根本積冊峻整有製度且其爲之

也警以敏居常哦咏不輟昔雲間諸子每讌集多擊博  
爲笑樂陳人中獨刻燭賦詩嘗云人之英華乘於壯歲  
過此衰落將安及乎蓋其勤如此今之堇浦則亦猶斯  
志也悲夫自朱公之死吾鄉風雅衰歇二十餘年矣物  
莫孤於其絕事當易乎其難異時老去堇浦猶能憶吾  
言否也仁和張燭

翰苑集序

錢思公謂朝廷之官惟翰苑非文章不可蘇子瞻亦謂文章之外不取他才然或以所作卑弱屑屑應用不可謂之文章卽子瞻猶自以爲空疎冗散才不逮古慚內相之名豈非其實之難副與故自唐元宗設官以來雖代有賢哲以充其選而直以翰苑名集者陸宣公一人而已宣公制詔奏議昭然與金石不朽而詩文賦集十五卷所謂雄文藻思摧古揚今者今先生蓋有過之嗚呼惟宣公不愧于翰苑惟先生不愧于宣公也權載之序宣公集曰仲尼有才而無位賈生有時而無命公才

不謂不長位不謂不達逢時而不盡其道命也夫宣公  
不與房魏姚宋生貞觀之年而與竇參裴元齡生貞元  
之世殆不可謂之逢時德宗以素知公名召對翰林卽  
日爲學士其知遇固深矣然當公十八登第僅以詞科  
博一縣尉唐所以位置博學之士者不已違耶今詞科  
不著於令惟

天子卽位之初特行久虛之典督臣卽以先生應

詔選入翰林蓋以博聞明識不世出之人鼎不可得之  
嘉會而授清秘之職 本朝之用人可謂樞其材矣先  
生位雖不達可謂逢時矣宣公之時詔書旁午倉卒填

委雖灑翰卽成曲中機會終有如歐公所云不得專一  
思慮以工文字其詩文憂深慮遠蓋亦變雅之作而先  
生幸際太平得與一時僚友從容柯亭劉井之間以其  
散直之暇肆志併力于文章蔚然而虎鳳躍鏘然而韶  
鈞發何其盛也讀是集者當知先生之才與所遇之時  
皆有過於宣公者不必區區以祿位相較而亦可想見  
國家盛治其侍從簪筆之臣爲博聞明識不世出之人  
也豈其以翰苑之榮誇於田夫野老而已哉同里後學  
曹芝

脩川集序

杭兄董浦董志局於海昌得詩如千首令予爲之引董  
浦之詩之工不待予言顧予竊有所念於海昌者得因  
董浦之詩而一及之海昌故文獻之窟也董浦拜無垢  
之祠式持正之里搜訪查職方罪維殘編豈區區騷人  
之遊錄哉而樊侍御光遠者楊文靖公高座弟子無垢  
之畏友也學錄不傳微言安在尚有知其講堂薦以溪  
毛者否職方志節晚寄託于絲竹以抒悲憤而姚監軍  
曷菴棄家長往以黃檗爲西臺化爲精衛尚有道其姓  
名者否抑又聞安陽許侍郎之令海昌也敦崇正學招

致姚江黃先生設臯比雅歌釋奠中吳徐侍郎果亭遠  
來執經反復叩證人之說安陽則傳三易洞璣之旨豈  
無薪火之貽足爲里社興起者乎堇浦其更爲我訪之  
是亦羣雅之才所當備也雙韭山民全祖望

嶺南集序

韓子遷潮文傳驅經范公帥粵錄著驂鸞此炎徼之藝  
林亦前修之筆苑也然志虞衡於桂海非無博物名篇  
而狀草木於南方未盡雅人深致必也珠池壁記旣兼  
子史之長韶石詩豪復得江山之助登高作賦二樓風  
雨驚飛結社分題五子敦槃麋至斯足擅湖山宗主不  
愧遊居作詩酒總持無慚羈賦者也惟我董浦先生淵  
水詞宗玉堂仙從紫霄翔步陸子春帝目佳人樂府徵  
歌元微之人呼才子賜元豐之金帶方筵清班焚學士  
之銀魚遽歸綠野蘇公堤畔遊從半魯國諸生謝傳山



邊問字徧元亭高足於是名傾江左譽溢斗南會羊城  
有童蒙之求羣迎康節鵝湖重經師之選爭迓林宗嚙  
肯來遊亦旣覲止高懸睇澤誰其叩不能鳴甘撒臯比  
僕亦後而欲往顧慚形穢敢托神交爾乃仲舉停車便  
尋徐穉長公渡海卽訪黎雲旣把臂以入林遂倡予而  
和汝時則信陵公子頻開文字之樽湘水詞人數與冠  
裳之會馮敬通文辭跌宕輟披吟陳曲遊門巷蕭條  
恒畱車轍清簾疎簾賭山果於僧寮香浦花田探驪珠  
於鮫室銀臺蠟燭時鬪尖叉銅鉢聲殘更調齷齪以故  
水村山郭喧傳杜牧之詩紙械弓衣並寫蘭陵之集梓

爲六卷價重三都笑顧鄙人盍作牴牾之導用陳涉見  
聊同糟粕之談竊惟言貴乎文孰謂詩非闢學顏光祿  
鏤金錯彩詎乏行廚曹臨淄繡虎雕龍定饒經笥假令  
書窺半豹摛文肯讓班生如其腹果五車厯物應逾惠  
子猷云名士只讀離騷豈有少陵但精文選若乃誤求  
杜若生吞謝朓之詩竊恐錯解蹲鴟笑破蕭嵩之口先  
生則琴箏五典肴饌百家瓠史芸編借出春明坊裏玉  
玦金版探來宛委山中宜乎雲湧濤驅氣歷萬夫而上  
海涵地負音追正始之前譬之集千腋以成裘曾無髮  
積釀百花而作蜜難辨馨香此馮夷所爲面旋小巫於

焉氣索者學其一也然而李善淹通僅稱書簏裴公弘  
博第號談林賦六合以娛人何能嫵媚讓河南而標位  
尚待錯綜故知錦織明光苦無裁製饒羅珍錯未易烹  
調人固不可無才言豈止乎有物先生則學如不及才  
患其多如營建章之宮千門齊闕似歷山陰之道萬壑  
爭流斥朱穆以專愚徒工著論詆左思爲傖父祇解研  
都得意忘言還筌蹄於竹素善師不陣輯鵠鵠於龍韜  
請看學足三冬何若才高八斗然則爲仙爲鬼終見擯  
於劉安宜稍宜桑宛貽嗤于匠石此度量相越步趨無  
由者才又其一也且夫文爲載道之言詩乃緣情而作

纏綿悱惻美人香草之篇敦厚溫柔陰雨谷風之什瓊  
樓玉宇心傷千里嬋娟劍閣瞿塘淚灑極天關塞自非  
太上詎易忘情僕本恨人誰能遣此鳥啼永夜輒爲擁  
鼻之吟雨暗蕭晨每唱懊儂之曲矧乃秦川公子歲歲  
離家西鄂名流年年失職烏金塔畔花飛九品蓮臺黃  
木灣邊月淡半江菱艤問老夫之左肅朝漢臺空弔詞  
客于南園抗風軒冷能無感慨正復淋漓白江州才擅  
歌行賦琵琶而愈妙李義山詞多寄託詠錦瑟以彌工  
君其刺海上之船杳冥無際誰則聽洞庭之樂怠惑胥  
忘小子何莫學乎先生其移我矣此則么絃獨奏衆音

皆停者又情深而文明者也具此三長足堪千古豈直  
橋名丁卯祇將清婉標奇體號西崑僅以穠纖合度會  
見濂泉蒲澗地以人傳錦石浮邱山因公重此日秘之  
甲帳珍同海外奇文他年副在名山添入滄浪佳話惟  
是管窺無當蠡測何知入明堂太室之中莫名其器觀  
西子南威之貌但悅其妍剛值殺青敢辭塞白巖詩之  
附工部方憂攘臂而前滕閣之序昌黎竊喜挂名其上  
云爾嶺南後學何夢瑤撰

閒居集序

某沂江將道棠之蓼舟中讀先生閒居藁乃輟卷而歎  
曰某何足與讀先生之詩哉太夫人在堂不能違色養  
而從役潘安仁所以賦也宅桂堂以侍輿軒羅典籍以  
充幣帛擁楹之暇積有文章先生所以定是集也夫親  
生之膝下以養父母父母之志蓋日望其子之賢而有  
立而又恐旦夕去吾膝下疾痛疴癢之不與知也爲文  
王之臣爲孔子之弟子不患不立矣而來諭之歌援琴  
之操感而有作其以此與後世戒養之誠亦少衰矣聲  
譽馳其志祿位攫其情捨朝夕之養以求榮而哆然藉

曰于養志韓退之曰子在家父母雖無離憂其志不樂  
也在外雖有離憂其志樂也然功名之士當其拂衣而  
起爲其親者牽裾固駐之或旣去而緘書招之所謂有  
離憂而志樂者其果然也與夫人之志動於壹而已有  
一心以宅憂又安得一心以及樂退之之言亦不達於  
情矣然則父母之志果何如而後樂耶東廣微之詩曰  
彼居之子罔或遊盤叔文之母曰好學爲福蓋惟學成  
名立覽老氏之知足而退脩惟孝之政立不朽之言庶  
無離憂而其志樂若先生者盡之矣某幸不嫌斥於先  
生而顓蒙朴騃涉隅角而輒滯年踰始衰一無所成就

以慰父母客江淮走燕趙陟屺一望懷袖靡依老父今年七十餘矣稱觴浮白之樂抗音頓足之歡闕然廢墜而又僕僕爲此行也某尚足與讀先生之詩哉某尚足與讀先生之詩哉同里曹芝



韓江集序

揚州地交南北舟車萃集之區四方士夫遊茲土者挾  
所請而來饜所欲而去凡名園別墅姹花媚竹之秀蒨  
不暇遊憩也桓廚鄴架尊彝鼎敦之美富不遑鑑賞也  
間有贈荅之章諛詞勦說藉作羔雁甚且驪駒乍唱姓  
氏旋忘風雅之道衰友朋之誼薄心竊悼之董浦先生  
掌教於安定書院擅斲輪之鉅手樹騷壇之大幟一時  
名彥咸從之遊今老而倦歸觴詠流連倦懷莫釋覩遺  
墨而制淚展畫梅以寄慨深情一往敦古處而挽頽風  
夫豈邂逅適願尋常之酬倡歌詠所可同日語哉今春

三月堇浦歸自揚州手出韓江一集見示大半得於推襟送抱琴歌酒坐之餘其氣磅礴而磊落其旨纏綿而悱惻漢上題襟之詠河梁落日之篇希踪曩哲殆庶幾焉余嘗假館茁邨翁濡雪堂別來忽忽三十餘年追溯雙清閣之鬪酒玉山堂之評書讀畫時往來於夢寐而不忘勝遊難再舊侶多睽誦先生詩益切余杖杜蒹葭之慕矣乾隆丁亥三月下浣同里汪沆

追古堂詩集目錄

卷一

橙花館集上

古今體詩三十九首

附刻詩一首

卷二

橙花館集下

古今體詩五十五首

附刻詩五首

卷三

過春集

古今體詩八十二首

附刻詩二首

卷四

補史亭賸稿

古今體詩五十二首

附刻詩二首

卷五

閩行雜錄 古今體詩六十一首 附刻詩二首

卷六

赴召集 古今體詩三十五首

卷七

翰苑集一 古今體詩六十首 附刻詩十一首

卷八

翰苑集二 古今體詩七十一首 附刻詩三首

卷九

翰苑集三 古今體詩八十六首

卷十

翰苑集四

古今體詩四十八首

附刻詩八首

卷十一

歸耕集上

古今體詩五十九首

附刻詩九首

卷十二

歸耕集下

古今體詩七十首

附刻詩三首

卷十三

寄巢集

古今體詩五十二首

附刻詩七首

卷十四

脩川集

古今體詩九十七首

卷十五

桂堂集

古今體詩五十七首

附刻詩三首

卷十六

嶺南集一

古今體詩七十七首

附刻詩二首

卷十七

嶺南集二

古今體詩五十八首

附刻詩二首

卷十八

嶺南集三

古今體詩七十首

附刻詩一首

卷十九

嶺南集四

古今體詩六十二首

附刻詩四首

卷二十

嶺南集五

古今體詩七十二首

附刻詩一首

卷二十一

閒居集

古今體詩七十一首

附刻詩三首

卷二十二

韓江集上

古今體詩七十五首

卷二十三

韓江集下

古今體詩五十二首

卷二十四

韓江續集

古今體詩三十五首

卷二十五

送老集上

古今體詩六十六首

附刻詩三首

卷二十六

送老集下

古今體詩六十三首

附刻詩七首

道古堂詩集目錄



道古堂詩集卷一

仁和 杭世駿 大宗

橙花館集 上

古蕩舟中望法華秦亭諸山

小雨吹不成散作谿響急溪行十八里初自石橋入脩  
竹烟濛濛半隱嵐靄溼忽然漏晴暉露出青戢聳松杉  
亘其腹高下蔽石級天影隨峰迴皴法變幽澀笑指梅  
花僧定有草廬葺

溪上集

十笏淨名室瀲灩春流環老樹當戶立密竹隨溪灣磧

中擣菹石幽語斷續間寒藻流不去相逐鯨魚還

石八郎祠

安樂山之阿叢祠表幽渚神爲石八郎祀典有其舉豈  
屬紛如齋或是敢當侶自咸淳迄今歷五百寒暑例以  
野廟碑捏塑暫如許畫帳因風開銜鬚竄蒼鼠荒荒空  
山中獨抱寒流處環以万玉妃飄雨潤楹礎門外清籟  
寂微聞石泉語

從柏家橋尋梅花泉

言尋梅花泉乃在石梁裏菖蒲青茸茸界斷一泓水何  
年萼綠華影落小潭底潄沸流不還穿過石齒齒客來

窺塵顏餘潤濺芒屨

蘆菴贈克念上人

窈然淨交蘆一室圍清淥門外杉艇小纜在東籬東老  
梅飛晴雪飄落黃篋篷溪路篆宇曲五里聞疎鐘開士  
盛禪藻句得杼山宗如花雨新好萎後吹天風慙我辟  
支乘已落聲聞中還師正法眼一質滄浪翁

入花塢遇雨度藕香橋至法楞庵

言從梅花林西下黃泥阪叢筠綠不分蔭密晝亦晚雨  
腳穿濃烟迷濛失近遠石梁亘谿腹苔滑立未穩翹首  
深谷松崖斷白雲偃僧房三十二半在翠微巖衲子事

春耕竹戶日常健山泉畱客烹率爾荷笠返但覺探徑  
幽已忘歸路蹇起視橫斜枝玉雪半凋損

會稽刻石

祖龍眈眈視九鼎滅六強國恣豪兇東上會稽祭大禹  
去疾居守臣斯從副車十乘省習俗羣臣黔首爭稱功  
役使萬指闢榛莽大碑矗立撐青空丹梯百丈鐫科斗  
鬼斧劈落蜿蜒蹤丞相筆法變史籀雕蟲篆刻光氣熊  
寄猥逃嫁無佚罰江乘橫截歸匆匆宮車晚宴沙邱駕  
骨肉奄化隨沙蟲深山寂寞一片石卻與岫嶂同磨礱

窆石亭

寂寥古殿魚膏昏豐碑轟轟光細細神風颯爽渺何許  
亂山合脊空招魂此石一文勢斜表其廣半之穿有痕  
形模豐下而銳首彷彿細綴螭虎文

皇朝乙酉正龍戰江頭士馬方雲屯健兒角技互嬉戲

雙手拔斷山靈跟

秀冰錄  
氏之說

我觀此石逾萬鈞一夫之力

何能云蛟龍蟠屈霹靂護雖有千指其敢捫摩掌三數  
發懍歎傳疑傳信非所論

雨過淨慈寺契原山堂聽嶺雲上人彈琴

蕭條樓櫺林雨轉清絕穎師淨名室孤影澹行迹棲  
棲木葉衣瘦肝遮不沒餘事山聲聞結想渺林樾散作

一  
指禪觸響動超忽七條泠泠弦不與山水隔晚花萎  
無香幽徑豔還滅天高風露澄戒縛破枯寂潭潭木石  
不  
到撥見古拙老猿躡月聽遙峯墮空碧

憇契原山堂追次堇浦先生聽琴韻

歸安沈榮仁  
獲村

放舟西郭門過雨聲未絕涼飈吹衫襟炎歊遁無跡  
紅蕖或低昂白鷺幾出沒高岡俯湍流精舍隱林樾  
導師逆客笑歲月話飄忽哦句禪味深揮絃俗情隔  
逢場每閱世萬象紛起滅湛然靈府中常照卽常寂  
余亦願證明機鋒苦鈍拙何時演三車聯席對寒碧

九月十八日紀遊

白帝乘秋纛爽氣淨餘歎連騎出南郭言觀曲江湖倚  
檻石亭上隔岸睇遠椒黃塵忽遮斷白雪空中澆驚沙  
飛笥飈疾颺走刁調礮逐目已眊突至誰能料前水萬  
弩勁後水千軍驍睢盱噓怒氣未洩鞭尸驕隄塘莽擊  
撞白矸連波搖濁湯吐濡沫石泐痕難消嗤彼踏浪兒  
浮軀等萍漂柔櫓敢簸弄倏爾亡其舫佇視久不見使  
我中心燥繡谷吳焯發高興謂當永中宵見潮未見汝幽  
會誰當拋襪被走僣從齊赴精廬邀簾前設茗椀僧伽  
手重招小園廣五畝繚以千篴筩萬頭山雞冠碧綠青

黃交偷戴鷄鵲幘假設鸞鳳毛無刀尾可斷非韶晨難  
號朦朧隱文采暝色籠烟梢禪鐙忽四照高縛松炬燒  
朱光映奇彩輝煌建霞標大聲起水面側聽紛奔哮揮  
手辭香剎仍來江頭邀冷氣沁肩脊儼著含風袍詩脾  
吸清露吟苦思轉高須臾白玉盤團圞上青霄大地橫  
匹練乃向空江包捲彼明月魄灑作秋波濤斷若齊紈  
裂散比吳鹽熬萬竅靜不噫噲吟壓羣鷁孤影澹行迹  
短髮吹蕭騷丁敬愍寒餓中堂羅酒肴吳均說後餅劉  
郎題餘饒二老哀夢沈嘉轍倦臨眺未醉先號呶起視辨曙  
色尊合座已逃歸述誇旁人屢禿虎僕毫



妝域聯句 并序

妝域者形圓圍如璧徑四寸以象牙爲之面平鏤以  
樹石人物丹碧粲然背微隆起作坐龍蟠屈狀旁刻  
妝域二小字楷法精謹當背中央凸處置鏤鍼僅及  
寸界以局手旋之使鍼卓立輪轉如飛復以袖拂則  
久久不能停踰局者有罰相傳爲前代宮人角勝之  
戲如武林舊事所載千千日下舊聞之放空鐘之類  
蓋藉以銷吹花永晝悶題葉閒思所謂妝域者也

深宮晝多閒樂事午相較

沈嘉轍  
樂城

舊戲罷攤錢餘歡收

握槊

屬鸚鵡  
太鴻

高擎拭烏皮圓轉走羸殼

吳淖  
尺鳧

花背龍紋蟠

巧心象齒斲

趙昱功千

萸香別方塋

世一

翻

衣痕千千拂巾角

鶚

午鍼豈能停丁腳不須捉

焯

在次

星離躔中規月還朔

嘉

久行戒欹傾小住防牽碩

昱

寶

曆暈重重風車盤數數

趙信意林

北南昧易遷朱碧眩難覺

鶚

十刻費環循一錐空倒卓

世

烏三匝未棲蕉百回仍

剝

信

蓬卷無根株渦洄亂清濁

嘉

徐時影續翻急處勢

騰踔

焯

氣竭猶蟻旋局殘屢鶴啄

昱

文窗紛合圍紅袖

競關撲

嘉

快奪金百鏃偏輸玉雙珥

信

迴腸託防閑匪

石謗謠詠

鶚

攏髻婢爭看扶腰女初學

嘉

眉顰側輕釧

臂瘦動寬鐲

世

人語喧行廊花光颺繡桷

焯

前塵已微

茫小物尙高邈昱細字認蠶眠兒嬉等燕濯信蒐羅譜

莫憑輿衍句從駁鶚徒用刻楮工相看齊一握世駿

三林吟屋與沈嘉轍厲鶚趙昱分咏節物

### 臘八粥

寒月嚴凝候初臨戊第三一餐傳淨甕五味出精藍旦  
過喧齋鼓冬餘供佛龕遙知諸宅貴口數坐分甘

### 爆仗

驅魑追故事篝火啟柴扉聲肖山竹裂紙如林葉飛滿  
城聽靜夜應谷送寒威中有幽詩意豐年響不稀

琉球扇用山谷酬穆父贈松筵韻

高麗白摺削藤紙

見圖經

琉球聚頭仿形似出入風前懷

裊馨瘦龍骨碾輕鸞子漸江江水胥潮寒持障旭影看  
秋山翠絛綰結畫榻冷置身恍在蛟室間

厭勝錢歌爲厲二

鶚作

厭勝錢吾未識厥面吾能溯厥祖漢代鑄有十四唐  
之封演譜共五嶠不能癖褻不能論河間姍女不能數  
宣和博古圖屈曲塗形模或昂然翹蛇首或隆然隱龜  
趺或爲神龍攫之而或爲天馬鼓嚨胡旁有粉米錯雜  
鋪山都木客應潛逋禦兒誰氏子手提一串苔花紫一  
錢繚繞盤龍鳳一錢宛轉堆雲蕊千秋萬歲本漢文金

玉滿堂出老氏古人取意必有以粵稽鄱陽洪适志其  
二有之餘闕矣厲君嗜古兼好奇其文一一摹拓之裹  
以古錦重裝池擲以示我我不知古用刀布週四角今  
製輪郭圓一規旣非永安五男製亦異貴主荆山撒帳  
時還君歎息題新詩君才百尺珊瑚枝文妖才鬼不敢  
覩區區阿堵煩爾收藏爲君不見東海黃公能厭虎金  
刀不靈爲虎侮又不見新室剛卯祓不祥貨寶雖鑄終  
滅亡不如日在錢眼坐錢神有知呵護我水泳山行無  
不可

題朱水部

樟

扁舟詩意圖

碧水抽帆盪曉寒岸痕倒樹壓晴瀾憑君收拾閒詩料  
解舍魚莊乳鴨灘

耽吟索句兩眉攢水部量才亦大難莫向頭銜問名姓  
後梅前杜是同官

喜姚

世鍊

自吳興至卽次其懷施

安韻

苦吟聯舊雨良覲共柴扉遠水初迎棹春寒忽上衣月  
窺虛室白花逐酒人飛此夕聞清嘯愁懷得所依

送姚

世鍊

還吳興仍用前韻

櫻筍連朝過幽人住遠扉髣髴吹瘦影墨瀋浣生衣有  
酒皆同醉如鷗又各飛莫愁歸路寂剩有柳依依

湖中看雨

珠點能輕擲春波肯倒黏玉駢鈎不住放下水晶簾

舟過景德禪院題三塔

三塔何年建崢嶸此道場雨中烟樹重猶放白毫光

禾中雜興

近水家家小築塘暝烟初起接湖光香茅縛作尖頭屋  
賃與吳淞上水航

密葉叢根貼水高菱湖十里不容篙小娃時蕩瓜皮艇  
劃破橫塘賽剪刀

桐陰十韻同徐

汪沔汪沔符之恒

新桐結夏涼爽氣滿虛閣清露溥蕭晨小雨閣疇昨陰  
移碎苔紋響逸散林薄千片綠雲委一寸碧珪削層層  
羃金井葦葦漾翠箔高枝入風稜重蔭逗日腳覆地淨  
若掃映空晚尤薄收香挂么鳳刷羽噪乾鵲玉局壓疎  
花銀牆布青蘄坐來詩旋成立處影小卻

題教授蘇先生

滋恢

寄吾廬四首

冰霜調護歲寒身酒國書城道不貧長與山靈稱地主  
自來冰鑑負人倫三年絳帳充都養十載青雲落後塵  
慙愧更無他報稱祇將詩卷祝長春

卅年京國主齊盟季虎頭龍各擅名風雨對牀同令弟



滄浪聯句有難兄傳家經術微能聞名世文章老更成  
何用東塗復西抹先生豪氣自縱橫

大夫七十合懸車吾愛吾廬賦遂初扶屐尙餘艾後草  
堆牀還有讀殘書一區錯比揚雄宅十畝新營履道居  
勝日春風歸撰杖門生例得奉籃輿

不向丹砂乞駐顏依然風骨鶴珊珊達觀自可題生壙  
論定何須待蓋棺

先生自言置有生壙壽棺以待餘年

舍北遠分螺髻樹

江東不少畫眉山就中穩臥烟霞叟百歲還驚靖長官

葉氏最古園觀王石谷山莊春曉圖

猗歟春曉日覽此春曉圖春水何澹蕩春山不模糊叢

條發新穎采色爭紛敷鸕鷀自在飛一一遙相呼山行  
忽已斷中有雙犢俱草堂生意足平階鋪寒蕪主人維  
摩詰說法陳毘盧禪悅通畫理妙墨娛清臚遠孫規家  
法拂絹工臨摹幾時南山南習隱開精廬賴君畱粉本  
著我山澤癯

同籍有戍遣之事寄詩奉慰

來日何當歎大難生全須信主恩寬三千磧道黃花  
古一兩輪蹄素戢寒去國定知無勝餞破家豈爲愛微  
官東西南北惟君使好作王程戴斗看

章繼永

顧正謙

見予戍遣詩憐而和之迴腸蕩氣

遂次前韻復呈二公

遷客長嗟行路難  
荷戈此去塞程寬  
日臨磨蝎元辰蹇  
關隔盧龍絕域寒  
喜免罪孥輸織室  
暫從囚服對刑官  
知交揮涕期生入  
鄉國回頭仔細看

同龔鑑過鄭安縣羽達

柳綿擘晴雪  
歷亂吹不墮  
龔生澹蕩人  
攜手肯好我  
意行破拘攣快  
獲幽興頗  
王劉侈清談  
張周奄入坐  
初驚酒海寬  
旋喜墨寶夥  
珍重金璫儲  
裝潢紫縹裏  
收來珊瑚網  
寫出鐵鈎鏤  
漻然太古心  
流觀計非左  
花信雖闌殘  
差喜未改火  
湖堦步屣便  
覲面山幾朶  
冷翠沾客衣

相約喚輕舸三人恣洄浴較畫更婀娜

鄭麟趾高麗史向爲花山馬氏衍齋藏弄道過虎  
邱于書肆得一寓目書二詩題後

海洋東割小江山史例居然準馬班  
屬國威儀徵市舶外夷文獻落吳闌  
百番蠶紙銀光砑兩姓鴻名玉冊頒  
擬向太常論四譯奇聞聊當采風還

海國華風亘古今鳴江如帶界遼金  
宣和已後紛傳史洪武中朝賜玉音  
百濟附庸陪遠道皇華館伴動高吟  
見吳子魚朝鮮詩選三桮五葉誇靈藥  
聞道東洋有貢獲

芳草

泊雨棲塵黯曉昏  
茸茸一望徧江村  
暖消晴霧侵嵐影  
寒翦春風漾水痕  
好句招邀青入夢  
故人追遞綠當門  
玉階清閨無人到  
狼藉鶯花日幾番

微雨

蹉跎二月破微雨  
作輕寒侵袂遙分潤  
釀愁別有端窗  
陰初曩歷花淚漸  
闌珊屐齒來深巷  
苔痕乾未乾

題仙巖山圖

吾聞福地七十二  
林壑幽阻仙所寰  
從頭數至二十又  
加六乃在羅陽之  
東仙巖山山高萬  
有八千丈千峰羅  
列相交環五潭四  
洞錯碁峙霞梯竊  
渺難躋攀軒轅學

道此託足煉丹甯井畱山間珠簾倒挂懸瀑急餘潤灑  
漚深漬莓苔斑披圖細細勞指點鼓勇欲往仙緣慳巖  
坳誰縛香茆屋門外蕭森蔭秋竹荒池廣畝清澈底照  
見生衣如水淥滿山藥草采不足猶荷鴉鋤劔黃獨厭  
聽漈漈礧泉喧高峯獨抱寒雲宿

雨過藤花書屋

一寸新桐乳重來綠已深畫檐同結韞彩筆借題襟清  
酒澆奇夜春花無苦心不知門外雨擁鼻尚微吟

以高麗圖經易王淳南集湯成

金源文字接北宋党蕭麻蔡紛參覃遺山淦水兩砥柱

鼎足更立王滹南滹南筆力倚豪橫滹經藉史精華含  
作文不肯媚丞相寧以死諍毋貽愆黃峴峰頭清淨地  
雙趺對結緘僧龕慵夫一集已零落尚遺辨惑畱金函  
餘文詩話四十卷本末粗舉吾猶堪中州一刼付煨燼  
典籍大半淪戈鏃上都捆載歸白下紙香一路吹旂鼙  
萬歷重編內閣目神物完好無差參繡谷亭北開屠屠  
仰就烈旭烘飢蟬有客剝啄啟門扇竟著高屐來花鈴  
隨手觸亂珊瑚網幕見虎視矜眈眈巧偷未能且豪奪  
藝苑不戒貪夫貪主人跂腳理籤軸听然左顧馳彫談  
東洋外有高句驪舶舩不阻蛟龍潭宣和徐兢曾奉使

山川道里恣窮探，版圖歷歷歸鉛槧。文筆秀掩春山嵐，  
吾嘗購買三十載，不獲一慰中心嫠。往歲書船夾兩板，  
烟雲過眼成奔驂。清齋苑結縈寢饋，春絲不斷三眠蠶。  
客聆君言識君指，敝簏所有君已諳。一編捷使青猿挾，  
脫贈不用盈肩擔。銀光繭紙印國璽，錦囊緘固封珠蚶。  
以此海東墨中寶，匹爾燕北文中彪。竒書各各欣未覩，  
辟以美人換花驪。吾家隙地二畝半，層樓三級圍朝岵。  
上貯文史一千部，行住坐臥隨搜妣。我歸晴窗展瑤笈，  
松花滿地鋪蠶蟣。儼入河汾面遺老，孱體倏爾忘憂悵。  
子亦一昔償宿負，如距斯脫喉祛痰。裝裹合配吾妻鏡，



東國之史傳其三三國通歷或收弄陪臣國書誰撻撻  
曩者語兒袁阿大夢日飲米汁抄清泔醉攜朝鮮濟北  
集持詫趙五昱梅花庵外夷文獻缺丁部什一千伯徒  
亥虢丞令小史錄副墨藏收竊擬追周聃

道古堂詩集卷一

道古堂詩集卷二

仁和 杭世駿 大宗

橙花館集下

題桐破山人畫冊十首

六曲麀眼籬玉露滴空翠  
秋宵清不眠侵曉起相對  
牽牛

剖此八瓣花團作二月雪  
高枝撐榱桷恨不化九節  
玉蘭

佛有廣長舌試與叅蓮宗  
爲是紅菡萏爲是青芙蓉  
荷  
秋蔬已除架冬菜又出土  
日日淪清饒吾不如老圃  
芋

豆蘆蕪

吳下竹園詩卷二

七十二竹派派派各有意此君太惜墨何不寫滿紙  
竹脈脈斜陽外江潭遠未歸柳疎秋社近燕子故飛飛  
楊柳燕子

筆底自春風何必脂粉浣午院烏圓來竟上石闌臥  
牡丹

清影落寒澗疎光澹林隙荒荒月二更照見冰雪魄  
梅汝有歲寒心人苦不知耳日持作談柄便已稱名士  
松枝

迢遞春波滿生綃翠作裳畫工真狡獪不寫入三香  
水

仙

雲棲

捨舟登沙觥十里遵林嶺萬竹森窈窕一徑通崔巍山  
行路轉窄濕翠不可揮綠陰逗秋日搖碎千珠璣初過  
七佛寺畦花爭芳菲竹棚架野圃芋大瓜瓠肥一亭轉  
穗珠澄水淥上磯亂踏竹筧路木葉吹霏霏竹牕老尊  
宿迫然悟昨非猛解世網縛來著離塵衣創此青豆房  
嗣法守莫違放生萬罔柵多生成皈依打鐘掃地僧樸  
遯無禪機戒本持四分不貽野狐譏

蓮池大師規約私拈古德機緣者出

院

鳩摩與僧肇譯經闡幽微徑山與報恩刻藏流芳徽

二者師所并五燈燄復輝影堂遺杖屨瓔珞垂素幃楞  
嚴記摸象想見枯禪頽塔前娑羅樹枝大蔭十圍天風  
吹石壇花雨飄浚激有客慕幽勝朝遊暮來歸齋厨響  
茶板淨甕分餘齏澹蕩試矯首雲壓青林飛

西興道中書所見

昨夜江流漲泥深路轉長雨沾豆莢潤風捲楝花香飲  
馬初臨收眼驚未出筐竹興行旅客指眼看嵐光

贈大善寺塔下老僧

古寺團團塔繙經草滿階問年頭似許對客眼初指佛  
座供銅盃香厨挂筍屨日長喧鳥雀得共飽清齋

江干竹枝詞

行李一肩青竹兜，淩風浩浩羨虛舟。  
越人赤腳踏波去，絕勝忘機水上鷗。

五月開頭醉不醒，吳山更較越山青。  
販鮮船到齊泊岸，水面南風盡日腥。

三郎廟前社鼓催，三郎廟外江水迴。  
眞箇居人太煩聒，村巫日日賽神來。

無題四首

秋千嬉過尙輕寒，人在春前感百端。  
碧海青天兩迢遞，紫檀紅撥動沈瀾。  
劇憐瑞雪搓還暖，嗔道曾波畫卻難。

小擘花箋續長恨蘭膏風削夜漫漫

恐與仙人別有緣一九飛雪駐華年月娥祇解偷靈藥  
天帝何曾借聘錢六百畫鸞招不得十三箏雁恨空傳  
楊花漂泊桃花薄惱殺東風故放顛

花叢幾日鑠春溫獨院迢迢寶鏡昏白舫青燈桃葉渡  
翠烟紅雨木瓜墩金蟲耀日分塵影銀燭無風減淚痕  
小別不須歌宛轉商聲哀艷易銷魂

芙蓉寶帳浥芬芳內視豐肌卻有方細草泊烟飛蛺蝶  
野塘如畫著鴛鴦雙行纏覆承雲襪九子釵橫卻月梁  
莫怪重簾阻消息不聞絃索摠聞香



秋柳四首

秋色兼旬到灞橋無端消息女兒腰永豐東角荒涼雨  
鄴水西頭上下潮社燕不來迷舊夢暮鴉飛盡見長條  
一盃細酌屯田土月冷魂殘不可招

西風昨夜拍堤吹綰綰條條慘淡垂渡口祇今餘白水  
酒邊何處覓黃鸝竭來衰草殘荷岸怕見啼烟泣露時  
策馬不堪尋舊繫赤闌橋外冷鞭絲

數株零亂酒帘邊無復珍珍貯翠烟斷岸冷圍殘夜月  
小樓寒咽夕陽蟬空持舊帶攀行客難弄衰姿伴少年  
迴首武昌飛絮盡一篙撐過藕花船

畱得長條伴白蘋  
鯉魚風起掠纖鱗  
飄零水驛來時路  
憔悴江潭別後人  
隄遠漸遮鴻背影  
天高愁拂馬蹄塵  
可憐冷落華林射  
不見春旗一色新

包家山看桃花復登桃關絕頂觀潮歸各作詩紀勝

二月幾望春過半  
城南花事貪天功  
欲雨不雨風日淡  
似霧非霧烟光濃  
一舟迢遞赴淥水  
沿緣嶺腳停烏篷  
人家鱗次花匝間  
以翠篠搖空濛  
翻疑屋瓦有阡陌  
界作畫格填青紅  
梵天寺古風峪峭  
絕壑不與漁郎通  
淩虛放眼泝空濶  
一洗塵面噓天風  
清江帶繞山一角

烟帆幾葉張虛弓春潮輕輓春浪緩雪花迸落嵐光中  
山頭紅雨江白雨鼓盪地軸燒天穹登登蠟屐倚頑健  
尋竒直過桃關東江天清麗坐收拾載筆畧記探花踪  
春雨書事用寇忠愍韻

一徑濛濛地端居感寸心亂飄魚火失寒逐野塘深雲  
濶迷新樹巖低匿暝禽明朝阻幽興無分策疎林

春盡日集復園對薔薇作

造物弄景光繁卉沐洪化醉暈凝百層狂豔張滿架妖  
嬈殿餘春爛漫逼初夏攢條發輕英接葉逗微罅敷如  
錦帳圓垂似寶釵卸彩雲飛不收燕脂抹還乍衙香百

和熏膠箋五色研窄窄蜂鬚排點點猩舌咋下蘊玉雞  
苗上覆紅綃帔露浥朝氣含霞烘晚陰射密刺鈎芳穠  
疎籬寄低亞薄寒畱幾分小雨暮三舍翦成巧婦纔摘  
處新粧罷笑靨風所撚棘心鳥不下歷亂干娉婷偃仰  
盡姪姪朱碧誤看成緋紫洵可借睹君多貽蕩對我若

邀迓晝疑買臣歸

張祐詩當晝開時正明  
姪故鄉疑是買臣歸

坐索麗娟價

花事等積薪風信此噉蔗轉愁朱顏凋慮逐青娥嫁東  
皇謝管領北墅得休暇惜花復惜春卜晝兼卜夜照手  
掬露華焚尾滴糟醅青赤互爭帝詩酒各定霸近嗅屢  
前席高照亟燒樺拂塵落坐裊牽裾礙行炙妍姿媚主

賓嫺態耀亭榭側  
光上衣紅倒影入  
杯瀉筆舌何鷹揚  
粉澤亦狼藉飽看  
霓衣舞會有錦袍  
謝

過故侍郎嚴公臯園

別業傳耆舊登臨  
一再經野樸明古  
岸淺水湫迴汀蟲  
齧荒唐樹苔侵臃  
腫亭居人已他姓  
欲問失前型  
有客耽吟癖相羊  
滯竹西水紋歸埭  
緩雲腳到城低深  
稜爭鋤菜輕舫喚  
罟泥春陰將草色  
映作碧玻瓈

同作

錢唐汪 沆 西顯

遺園依古堞池館  
半荒涼剩石欹莎  
徑疎梅亞土牆  
名流一代盡勝地  
幾人忘坐看廻環  
水泠泠送夕陽

錢唐符之恒南竹

一室少詩意春風入舊園  
寒烟棲木末活水鬻城根  
出土菜初賣覓魚人忽喧  
獨遺今昔感花底竚無言  
風雅伊人遠懷哉水一方  
村民分廢地小草占廻塘  
屋老愁多雨苔荒黯黯陽  
迎人修竹好日暮侍成行

絡緯

夜績來同巷哀音感總帷  
徒勞聒嬾婦不解恤窮嫠  
幽樹無靜葉空機多亂絲  
猶傳唐魏儉淒斷薄寒時

開湖曲

葑草平堤一抹鋪原田幾稜  
割僧租月波橋上重廻首

才識空明裏外湖

赤山埠口不容刀幾日湖波貼岸高宛似錢唐秋九月  
一江趲漲送胥濤

礬頭山染佛頭青六里蘇堤緯作經一色玻璃水天濶  
鷺鷥飛不到南屏

寧盡蒲芽更荻芽酒船鴉曳酒帘斜晴波望望平如掌  
只少芙蓉十里花

先農壇十六韻

播種思炎帝陳常荷有邵春光看冉冉原野各每每陌  
北阡東廣雙階五尺恢蟄驚雷始震脈發土方荻雨露

天陽受句萌地氣回除壇城郭近問樹柏松栽天子勤  
千畝諸侯協九推頭銜銜曉出從騎破塵來翠甸藏蛙  
吹青旂覆雉媒先期陳黛耜宿戒闢汙萊窸窣風吹麥  
霏微雨洗埃水庸臘可賽先嗇祭仍陪或見鳴鳩拂常  
多布穀催里魁祈社罷田畯勸農纔欲介盈寧福先憂  
滿青災奉行成故事會見阜民財

祭竈詩和金

農

甲子驚頻換庚申守愈難何來老婦祭翻洽比鄰歡缸  
面加皮厚蕙心蠟蒂寒輪君踞觚坐繞屋有晴山

揚州過訪余

元甲

濡雪堂留飲招同屬

鵷

閔

華

陳



阜

苗村詩老性孤馥  
詠耽書韻事兼千里  
鷺盟喧竹屋  
幾年鰥緒悵蘆簾  
青燈颭雨光初滴  
黃菊侵霜價漸添  
攜得歲寒相伴侶  
一堂標格共清嚴

贈余

元甲

江湖小集題此代柬

六十三家集江湖蹟杳然  
書坊睦親改善本  
解元傳

石倉

吳丈有宋槧本末署陳解元書棚刊在睦親坊

清氣知難滅  
幽吟共爾研  
還應

石倉叟宋槧校遺編

杭堇浦見遺南宋小集書白石道人詩後

江都

余元甲

葭白

之子竟歸去相隔音驛疎何期乘越舸寄錄南宋書  
夜闌心未闌雪案孤燭秉白石詩粼粼弋獵欣一騁  
尊挹黃太史掘得雙井源句法造深澹幽微欲無言  
尋繹不盡味索索繭抽緒危吟風竹知戛響助清苦

嘲張增病足

張子寂寞居一足抱微疴初時走矍矍倏爾失奔駢  
竊思隱囊憑行取木突代不免短狐嘲忽惹穀犬吠瘍醫  
診微芒兩眼施黻黹搜充嶺南方剗殺去疵類始灼艾  
火攻旋用符水漑謂當慎朶願腊毒慮內潰跂腳但高  
眠藥力可熏概不然鼈斲跣恐與眇者配俄而介帙來

向我訢殢殢筮咸之二爻易理汝所昧輿脫輻則傾羝  
觸藩不退臀困于株木餽覆其鼎鼎汝何行次且致令  
腓有悔前哲不吾欺一一爲汝誨下堂樂正憂易簣曾  
子慨疾行無善步躁進轉多閔春冰與虎尾此義罕津  
逮錯趾非其履一蹶不可再躑躅翰墨場進退韋弦佩  
雖爾短三寸取用或有在古稱五經笥又號掉書袋與  
我一人半共作後車載

雨

一雨綿晨夕虛堂翦燭聽相將理琴硯潤氣入疎櫺鷹  
爪茶初熟魚苗水未腥畫檐微溜滴斷續雜風鈴

簷溜十二韻

藻井沈沈暗琤琮滴滿階盤渦傾碧琰微湯濺棕鞵清  
淚銀蟾落明珠老蚌偕投壺飛玉箭刻漏卸金杵冰筴  
寒猶結晶簾晚更排蜂房垂點點鴟尾瀉潏潏鶴啄紛  
無數魚吹豈有涯斷聲依故迹餘響咽空街據屋飢能  
建分溝篲不欬奔流何太急小住亦爲佳伏枕聽殊苦  
垂堂韻自諧虛檐羣鳥寂畱爾伴清齋

吳明經

燈

酒半出玉瓶示客屬賦

閏三月在朔密雨轟如織意行豁目塵打門祛魔睡不  
速客來三尊酒簋用貳豪吟快搏拊高言洩清閼精鑒

展綫中元賞出奇  
器紫光照觚盧寶氣射瑤筍頂臚獅  
尾雙旁列螭首四瓣瓣銜銀花朵朵結素穗稜稜露空  
嵌了了見行次周遭何瓏玲曲折仍微緻剗中分碎繡  
密理發空翠良工費雕鏤智者妙游戲初窺詫光精細  
測轉深邃棘針不能彎霜刃那可施將母天巧存是有  
鬼工欬摩挲緬斲削徑路絕思議想當鐫劖時畧識玉  
人意屏氣言毋哢俛首目裂眥矧膏鵬鵠新芒淬芙蓉  
利曉動睛不搖屑落口屢吹精靈所剗鏤指腕肯刻驚  
歲月盛流傳旁觀亦顚顚吻渴壓糟牀氣竭求雞泊長  
謠嬋蒼雅玩物戒喪志

郊遊同厲

鶚丁

敬

符

之恒

集古冢下作

清思蕭間甚招延入遠村山花出叢薄野秀浹春溫有  
客吟谿路無人哭墓門東風不相惜吹徧舊苔痕

同作

錢唐

丁

敬

敬身

閒情無遠近處處似相粘坐或村童雜吟多野鳥兼  
春畦舒翠斲花徑糝紅鹽榆火傳新乞孤烟出短簷

送五舍弟

世瑞

就昏黔陽

弟今去弟勿違黔陽去我乃隔四千二百有餘里水程  
滾滾山程岷嶠非足可越翅可飛計程五月始可達枇  
杷已熟楊梅肥官齋大好游行地軟塵不到人來稀畫

簾乍捲輕霧散曉日初上晴山暉阿翁授汝餐阿母製  
汝衣坐汝綠陰之東牀爲汝畫閣開東扉報衙聲裏畫  
眉罷繡棚翠桁恣因依蠻花狔烏啼芳醅弟今去弟勿  
違若過洞庭手莫揮洞庭君女乃是柳毅妃風鬟霧鬢  
髮不晞傳聞遺像捏塑湖之碕書生貌美百靈秘怪恐  
不威易以假而函光輝神鴉啞啞蹲危柁水神隱隱搖  
雲旂船頭牲福醺美酒波濤恬息神靈祈汝雖峒疆未  
可非更歷鄱陽湖大孤小孤雙峙高崔巍髻或青螺綰  
裙或綠草圍彭郎口實至今幾千載過客輕薄攢嘲譏  
大凡佳山美水神所宅妄語偶觸生危機諄諄髦語爲

汝誨弟今去弟勿違暇時可過二酉洞藏書千卷汝可  
充朝飢善卷之墓馬援廟緘書一一報我搗管流音徽  
龍標南去五溪地唐之詩人王昌齡段成式磊塊歷落  
滴下千珠璣汝行收拾攜婦同來歸雲容容兮風澹澹  
勿令吾母汝兄朝暮雙眼睵

竹屏二首

屏山曲折畫牆東只隔亭臺不礙風低亞疎花隨宛轉  
勻排瘦簾透玲瓏青條翠莠生如寄紫蝶黃蜂路可通  
兩處攀枝杳相望愛他面面是方空

三春花事各紛披短竹團成鹿眼籬直節轉能容冶葉



高標特遣約狂枝鴛機倒挂九張錦畫格橫陳一局碁  
午院日高紅滿地翠奩浮動影參差

南華堂觀鶴浴聯句

玉立兩胎禽對結臨池伴世駿清容本斲冰潔操詎涅炭

厲鶚火齊一星冠綠沈雙玉斝沈嘉未思餐碎粟不怕規

圓彈吳焯篆印擘晴莎禹步到沙岸世駿鱗鱗碧練翻櫛櫛

銀雲爛焯圓吮蘸砂泉倒影踏霄漢鶚襴褕振素華瑤

璫激春瀾嘉青田脫塗附白雨紛汗渙世駿晞光明縞衣

跳珠落玄祿嘉頭低頸轉昂左刷右乃換焯洗毛女裙

裾漸水妃帷幔世駿楊袂快西吹聳翮睇北瀚一飲漱微

噤三沐起清瘡

鵲

望雲仙騎輕畫水兵爪亂

嘉

搜昶宣

髮梳蠲淨佛頂灌逸格邁海鷗高羣謝井鶴

鵲

浮藻開

復聚沈魚驚且憚水語攪幽修花片點璀璨

掉

廻波擎

忽披陷淖脰疑斷

世駿

長身戛瘦骨雪色灑脩翰華清已

隔塵遼天湯言算

嘉

懷玉信前生鳴臯異近翫

鵲

蛻羽

委麤氈烟際共蕭散

世駿

### 東臯雜詩

東陽幾日焙春苔綠野浮光刺眼來近水許多黃蛺蝶  
菜花先背小桃開

雨慙風憊感百端平原處處作春寒斜陽一桁忽如抹

紅上酒家青竹竿

雨腳才收日腳吞  
重陰漠漠漾春魂  
故尋流水彎環去  
直到野人青竹門

東郭人家近野塘  
水村南畔足幽香  
今年十日雨八九  
苦竹編籬補壞牆

莎徑斜編槿樹笆  
茆檐低稱野人家  
紫茄白苧青蠶豆  
小雨吹成五色花

日日攀青踏碧還  
莎衫桐帽稱疎頑  
橋頭一角肯畱客  
近聽流泉遠看山

送同年俞維壩之任袁浦場大使

莫爲名微悵別離  
龔官卻與養親宜  
船頭蝦菜憑時買  
庫裏封椿計日支  
蘆浦竭來須有記  
海門獨望自吟詩  
野王臺近秋風厲  
遠道還能取酒資  
宋劉昌詩爲蘆浦  
場大使著蘆浦筆  
記

爲許端題無名氏畫冊

許子愛畫如愛名  
有名之畫力所爭  
門攤市集恣搜索  
粉墨蕭瑟精神并  
一舫貯畫可七尺  
一堂寶繪才三楹  
神品逸品定世次  
錦題玉軸標縱橫  
何來能事太高邈  
邱壑幻出烟霞情  
拖泥帶水變皴染  
堆紅嵌綠煩經營  
時代邈如姓氏闕  
清遠不知誰所成  
我能辨畫不辨名

題詩報語高陽生畫家寫物貴寫意意到便以名爲輕  
荆關董巨世何有紛紛俗筆徒令藝苑流虛聲

立冬日臯園小集同厲

鸚姚世鉉

暝烟林外鬱難消竹引溪光過野橋此地定知魚最樂  
一枯祇欠月相邀枯萍小港除瓜架老樹空庭挂藥瓢  
更約明朝理杉屋紙窗幽夢永寒宵

道古堂詩集卷二